

Anabi Iliasu



The history of the prophet Elijah in Illo Busa
as recorded in the books of the prophets:
1 Kings 16:29 - 19:21 and 2 Kings 1:1 – 2:18.

Kiano Takada Kaaku

Isila'ilano kia Ahabu

Yahudano kia Asa kpatabena wê bapia piasaideũ akũ Omeli ne Ahabu gẽ Isila'ilano kia ũ, à kpatabè Samalia wê bao weepia. À yã pɔ Deke ba yidio kè a de gbẽ pɔ dònɛ ɛɛnɔla piki. Zena kũ Nɛba ne Yeloboamu duunkenado di kɛnɛ peke ũo, akũ à Sidōdeno kia Ɛbaali nenɔgbẽ Yezabeli sè na ũ, akũ à ɔdò zɔbena Baalinewa, ìkũ a tɔ si. À kpɛ dò Baali pine Samalia, akũ à a sa'okĩi kè kpé piũ. À Asetaati lí pètɛũ dɔ, à sùka à Deke Isila'ilano Lua pɔ fẽ a de Isila'ila kia pɔ dònɛ ɛɛnɔla piki.

Ahabu gɔɔ Beteli gbẽ Hieli Yaliko kèkɛ. Pɔ à a bĩi zĩnnapète, akũ a nenɔgɔn kaaku Abilamu gà. Pɔ à a gĩlɛ gambuno pète, akũ a ne zādi Segubu gà, lapɔ Deke ò Nuni ne Yosuanɛ à òba.

Kɔngano anabi Iliasu gwana

Tisɛbɛ gbẽ Iliasu bò a bɛwa Gileada busuũ, à gèɛ à kia Ahabu lè à ò: Kũ Deke Isila'ilano Lua pɔ máda zɔbenɛ tɔdo, sena zaa wê diũ fii da kpao, legũ da mao. Sema gɔɔ pɔ ma ò baasio.

Akũ Deke yã'ò Iliasunɛ à ò: Fɛtɛ n gɛ zĩtɛ ɔdi, ndí utɛ Kɛliti swawɛũ Uudɛ kpɛlɛ, ndíkũ swa pì í mi. Ma ò kɔnganɔnɛ ankũ n gwa gũ. Akũ à gèɛ à kè lapɔ Deke ònɛba, a ku Kɛliti

swawẽũ Uudẽ kpele. Kɔngano dikũ mone kũ bulodido kũ nɔbɔdo kɔnkɔ kũ ɔkɔsido, akũ ikũ swa pì í mi.

Salepata gyaano Iliasu gwana

Gɔɔ pia kpe swa pì í bà, pɔ legũ dá ma bùsu piũo yãdi. Akũ Deke yã'òne à ò: Fete ò ge Salepata, Sidɔ sɛɛ, ndíkũ ku gũ. Ma dì gyaano takaside kene àkũ n gwa gũ. Akũ à fete ada ge Salepata. Pɔ à kà bĩ pì lɛwa, à gyaano ke lè, ada yaka we gũ. Akũ Iliasu lezù gyaano pidi à ò: Ge ò momea kũ ído, baa yɔnkɔn, mà mi. Pɔ ada ge dādi, Iliasu sùka à lezùdi à ò: Ndí momea kũ bulodi mikonado dɔ. Akũ nɔgbẽ pì òne: Kũ Deke n Lua tɔdo, baa kaa maba vĩo, sema wititi ɔkũ do pēnaũ kũ nisi yɔnkɔnnado tuuũ baasio. A yàka máda we di, mí tá be mà pɔbena kedo wà be kũ ma nedo, wíkũ ga dā. Akũ Iliasu òne: Su ò to vĩa n kũo. Ge ò ke lapɔ n òba, esɔ kaa kedo yɔnkɔn ò mɔdomea gĩa, ndí basa ò n pɔ ke kũ n nedo. Zaapɔ Deke Isila'ilano Lua ò wititi da laka pēnaũo, mí nisi da laka tuu piũo ee gɔɔ pɔ àa to legũ ma bùsu la ge à ka. Gyaano pì gèè à kè lapɔ Iliasu òneba, akũ andá pɔbe maka ee gɔɔ ũkpa, akũ kũ a bɛdenɔdo kũ Iliasudo. Wititi di laka pēna piũo, mí nisi di laka tuu piũo, lapɔ Deke ò Iliasune à òba.

Bee kpe nɔgbẽ pì ne dá gyãke. Pɔ gyã pì gbãakũ maamaa, akũ ne pì gà. Akũ nɔgbẽ pì ò Iliasune: Lua gbẽ, bó mí wá kakai, akũ n mɔ ma bewai? N mɔ ma duuna yã dɔdi Luaũ, zaapɔ à ma né de ya? Akũ Iliasu òne: Ñ n ne pì kpama. Akũ à ne pì sì nɔgbẽ pì ɔzĩ, à dèdèdo kpedinakɔla kpe'ee pɔ à pìtaũ. À a wùte a wuteɔwa gũ, akũ à wikipè Dekewa à ò: Deke ma Lua, mɔkɔn

mí n tò gyaano pɔ ma pita a bewa né gà, n pɔsi kpàdi ya? Akū à kua dì nɔgɔna piwa gēn aakɔ, à wikipè Dekewa à ò: Deke ma Lua, to a unde suka à su a mebaasiū. Deke Iliasu wikipena mà, akū unde sùka à sù ne pì mebaasiū, à vù. Pɔ Iliasu nɔgɔna pì sè à pìtado, à gèdo kpu, akū à a kpà a dawa à ò: Gwa, n né bée! Akū nɔgbē pì ò Iliasunɛ: Má dɔ sà pɔ Lua gbēn n ũ. Deke yā pɔ bò n lēū sīanaɛ.

Iliasu kū Obadiado

Iliasu gɔɔpiakè gū. A wè aakɔdeū akū Deke yā'òne à ò: Gɛ n n gīna mɔ Ahabunɛ, mí to legū ma a busuū. Akū Iliasu fète ada gɛ a gīna mɔdi Ahabunɛ.

Nɔa sɔ à pāsīkū Samalia, akū Ahabu à a bɛ yākekenna Obadia sìsi. Obadia pì sɔ ì mikute Dekene maamaa. Gɔɔ pɔ Yezabeli dá Deke anabino dɛdɛ, Obadia an setɛ gbēn basɔɔ, à an ute gbewenɔū gbēn bapiakwikwi, akū à an gwa kū pɔbenado kū ído. Akū Ahabu ò Obadianɛ: Wà lika bùsu piū piki wà gɛ gbɛ'ino kīa kū swawenɔdo piki. Wìdikū dɔo tó wá sē le wà wá sɔno kū wá faaganɔdo gwado. Akū an bùsu kpaatè kɔne, an baapiki a zé sè. Pɔ Obadia kpàkī kū Iliasudo zeū, à a dɔ, akū à wùte a nesewa à ò: Ma deke Iliasu, mɔkɔn dia? Iliasu wènɛ à ò: Maakūɛ! Gɛ n o n dekenɛ ma su. Akū Obadia ò: Taali kpete ma kè, akū nda maakū n zɔbenna na Ahabunɛ a ɔzī à ma dei? Kū Deke n Lua tɔdo bui ke kó bùsu ke ku pɔ ma deke gī gbēno zīdimmá an n weteo. Tó wà ò mba ku gūo, ì to an o an sì kū pekedo. Akū nda omɛa sà mà gɛ mà o ma deke Ahabunɛ n su ya? Tó ma gête, maakū dɔ gu pɔ Deke Nina da n sɛ à

tandoo. Tó ma gɛɛ ma ò Ahabune, mí i n leo, àa ma dɛɛ. Maakū n zɔbenna sɔ ma mikùtɛ Dekene zaa ma ausugɔɔ. Ma deke Iliasu, pɔ Yezabeli dá Deke anabino dɛdɛ, ndi yā pɔ ma kè mao de? Maakū mí ma an gbēkenɔ sètɛ gbēn basɔɔ, ma an ute gbewenɔū gbēn bapiakwikwi, ma an gwa kū pɔbenado kū ído. Akū n̄da om̄ɛa sà mà gɛ mà o ma deke Ahabune n su ya? Àa ma dɛ. Akū Iliasu ò: Kū Deke Zīkannanɔde pɔ máda zɔbene tɔdo maa gɛ à ma e gbāa.

Iliasu kū tãadenɔdo ku Kaameli gbesĩsĩ musu

Akū Obadia gɛɛ à dà Ahabulɛ, à yā pì ònɛ, akū Ahabu gɛɛ dadi Iliasulɛ. Pɔ Ahabu Iliasu è, à ònɛ: Isila'ila busudenna, mɔkɔnn di ya? Akū Iliasu ò: I ke maakū mí ma Isila'ila bùsu dèò, mɔkɔn kū n mae bedenɔdo aakūnɔ mí a dè, zaapɔ a pākpà Deke yādinanɔdi, á tɛ Baalidi. Isila'ilanɔ sisi piki sà an kakaamadi Kaameli gbesĩsĩ musu kɔa kū Baali tãade gbēn oaa pia kū bapiakwinɔdo kū Asetaati tãade gbēn oaa pia pɔ andì pɔbe kū Zezabelidonɔdo.

Ahabu Isila'ilanɔ sisi piki, akū à tãade pinɔ kàkaa Kaameli gbesĩsĩ musu. Akū Iliasu nà Isila'ilanɔ sɛɛ à an lá à ò: Áakū yā kūna ɔkpɛadi ee bɔɛzĩ ni? Tó Deke mí Lua ũ, à tɛdi. Tó Baalie sɔ, à tɛdi. Andi yāke onɛo, akū Iliasu ònnɛ: Deke anabino guaū maakū mí ma gɔ ma do. Baali tãadenɔ sɔ an gbēn oaa pia kū bapiakwido. À zusa kpawá mɛn pia, tãade pinɔ dí a mendo sɛ an zɔɛzɔɛ an ka yàkala, an su an tekawao. Maakū sɔ maa a do keke, mí ka yàkala, maa tɛkawaa sɔo. Ankūnɔ an Baali tɔ si, maakū sɔ maa Deke tɔ si. An gbē pɔ yā mà à tɛsɔwa akū

mí Lua ũ. Akũ gběmpiki ò: A maaɛ! Akũ Iliasu ò tãade pinɔnɛ: À zusa mendo sɛ à kɛkɛ kaaku, zaapɔ aakũɔ mí dasi. À á deke tɔ si, esɔ á su à tɛkawao. Akũ an zusa pɔ wà kpàmmá sɛ an kèkɛ, akũ andá Baali tɔ si zaa kɔnkɔ ee isātɛ gɛɛ à kà midanguaũ. Andá ũwã, andá lika sa'okĩi pɔ an bòdi, andá o: Baali, wá yã ma! Baa kũ beedo andi yãke mao, i an yã mao. Pɔ isātɛ kà midanguaũ, akũ Iliasu dá an yaado à ò: À wikipe gbãa, i ke akũ mí deke ũo de? A laasoo tà sɛedo, á dɔ ya? À gɛɛ bɛ kpe ya? À gɛɛ bĩiũ ya? Ada i'o, akũ áda a vũ ya? Akũ andá wikipe kũ kòto gbãado, andá an gĩna lili kũ fěndado kũ sɔkɛdo lapɔ andi keba, ee au dá basi an mɛbaasiwa. Pɔ aula gɛɛ à pitadi, akũ andá yã likaa o ee ɔkɔsi sa'ogɔɔ gɛɛ à kà. Baa kũ beedo i yãke onnéo, i an yã mao, i swa dɔndio.

Akũ Iliasu ò paine: À na ma sɛɛ! Pɔ an nà a sɛɛ an piki, akũ à Deke sa'okĩi pɔ wà gbòo kèkɛ ada bo. À gbɛ sɛtɛ mɛn kwi wɛɛpia Yakubu buinɔ dasi lɛũ. Yakubu an Deke yã'òne yãa à ò, wàadi onɛ sà Isila'ila. Pɔ à Deke sa'okĩi pì bò, akũ à wɛ yɔ à likadi. Wɛ pì kà à í si lita gɛo takaba. À yàka kà sa'okĩi pila, à zù pì zɛɛzɛ à kà yàka pila à ò: À í tɔ bella siikɔ, í ká sa'obɔ piwa kũ yàka pido. Pɔ an tò, akũ à ò: À suka à tɔ dɔ. Pɔ an tò, akũ à ò: À suka à tɔ à ke gɛn aakɔ. Akũ an tò ee gɛn aakɔ. Í pì basì à lika sa'okĩi pidi ee wɛ pì pà. ɔkɔsi sa'ogɔɔ an anabi Iliasu nà a sɛɛ à ò: Deke, Bulaima kũ Isiakado kũ Isila'ilado Lua, to wà dɔ gbãa pɔ mɔkɔn mí Isila'ilanɔ Lua ũ, mí n zɔbennan ma ũ, máda yã di ke, pɔ mɔkɔn mí n òmɛa yãdi. Ma yã ma Deke! Ma yã ma, pɔ gbɛ dinɔ dɔ n Deke mɔkɔn mí Lua ũ, mí nda an sɔ

litenné, pɔ an suka an summa. Akũ Deke tɛ pìta sa'obo piwa kũ yakado kũ gbɛ̀nɔdo kũ busudo, an tekũ, akũ í pɔ ku wè piũ bà. Pɔ gbɛ̀nɔ è, an wùtɛ an nesewa an ò: Deke mí Lua ù! Deke mí Lua ù! Akũ Iliasu ònné: À Baali tãadenɔ kũkũ, an gbêke su à wotowáo. Pɔ an an kũkũ, akũ Iliasu gèɛ́ndo Kisɔ gusiteũ, à an dɛdɛ gũ.

Iliasu ò Ahabunɛ: Gɛ̀ n̄ pɔbe, ndí imi, zaapɔ ma legũ kɔ́fí mà dɔ. Akũ Ahabu gèɛ̀ ada pɔbe, ada imi. Akũ Iliasu dèdɛ à gèɛ̀ Kaameli gbɛ̀sĩsĩ pì musu, à soempɛtɛ à wenkpètɛ a gbu. À ò a zĩkennanɛ: Gɛ̀ n̄ gu gwa tekɔ ɔdi. Akũ à gèɛ̀ à gwà. Pɔ à sù, à ò: Peke ba ku gũo. Akũ Iliasu ònɛ à suka à gɛ̀ à gwa dɔ, akũ à gèɛ̀ maka ee gẽn soodo. A gẽn soopiadeũ akũ zĩkenna pì ò: Ma legũsisina è yɔ̀nkɔ̀n landɔ ɔtaaba, ada fɛtɛ tekɔ musu. Akũ Iliasu ònɛ: Gɛ̀ n̄ o Ahabunɛ à a sɔgo dɔ sɔ̀nɔnɛ, i gẽu à pita gbɛ̀sĩsĩwa ee legũ dakũ ginɛ. Legũ dá sisi busebuse, ẽnizaga fètɛ, akũ legũ kwè. Ahabu ku sɔgoũ, ada tá Yezeleli. Deke gbãa pìta Iliasuwa, akũ à a utada kàkaa à kũ, à basì à gè̀ ɛɛ Ahabunɛ ee à gè̀ à kà Yezeleli.

Deke bon mɔ̀na Iliasuwa Holebu

Pɔ Ahabu yã pɔ Iliasu kè dòdɔ Yezabelinɛ piki, lapɔ à tãade pinɔ dèdɛ kũ fẽ̀ndado an piki, akũ Yezabeli lekpele kè Iliasunɛ à ò: Ee zia makaa'i, tó mi kenne lapɔ n kè tãadenɔnɛbao, tãanɔ yã pãsĩ kemɛa bẽebẽɛ! Akũ vĩa Iliasu kũ, akũ à fètɛ à basì à a gĩna bokĩi wètɛ. Pɔ à kà Bɛɛsɛba, Yahuda busuũ, gũ à a zĩkenna pì tò, akũ à ta'ò gugbangbeũ gɔɔ do. À gè̀ à zĩtɛ sɛ́ lí gbu, akũ à wobikè à le à ga à ò: Deke, di mòmá.

Ma se gɔɔ, zaapɔ maba de ma dezinɔlao. Akũ à wùte ada i'o sɛ́ lí pì gbu.

Malaika mò gũ, à ɔnàwa à ò: Fete n pɔbe. Pɔ Iliasu gu gwà, akũ à kaa asana kũ ituudo è katena a mizĩ. Akũ à pɔbè à imì à sùka à wùte. Deke Malaika sùka à mò a gẽn piadedi, à ɔnàwa à ò: Fete n pɔbe, zaapɔ tá gbǎá nda mo odi. Akũ à fete à pɔbè à imì. Pɔbena pì tò à gbǎa lè, akũ à ta'ò gɔɔ bapia fǎatɛ kũ gwǎafido ee à gèè à kà Lua gbesĩsĩ pɔ wì o Holebu. Pɔ à gèè ada i gbesĩsĩ pì wèũ, gũ an Deke yǎ'òne à ò: Iliasu, bó nda ke lai? À wène à ò: Deke Lua Zĩkannanode, ma ze ma gi fĩnini n yǎ musu, zaapɔ Isila'ilano pǎkpà n í pɔ kuńdo yǎdi, akũ an an sa'okĩino gbòo an n anabino dède kũ fẽndado. Maakũ mí gɔ ma do, akũ andá ma wetɛ sà. Akũ Deke ò: Bo n ge n ze ma ɛɛ gbesĩsĩ musu le, mí gẽ n ɛɛ.

Ẽnizaga gbǎa fete, ada gbesĩsĩ pino paa, ada gbesino wiwi Deke ɛɛ, esɔ Deke ba ku ɛni piũo. Ẽni pì kpe tɔɔte lùkpalukpa, esɔ Deke ba ku tɔɔte lukpalukpana piũo. Tɔɔte lukpalukpana pì kpe sà, tɛɛ, esɔ Deke ba ku te piũo. Te pì kpe yǎkpǎina mí do busebuse. Pɔ Iliasu yǎ pì mà, à a utada kù a wela, akũ à bò à gèè à zè gbewe pì lewa, à mà wà òakũne: Iliasu, bó nda ke lai? À wène à ò: Deke Lua Zĩkannanode, ma ze ma gi fĩnini n yǎ musu, zaapɔ Isila'ilano pǎkpà n í pɔ ku n do yǎdi, akũ an n sa'okĩino gbòo an n anabino dède kũ fẽndado. Maakũ mí gɔ ma do, akũ andá ma wetɛ sà. Akũ Deke òne: Suka n ta Damasaku gugbangbeũ. Tó n ka gũ, ndí Azaeli di Suliano kia ũ, ndí Nimisi tokona Yehu di Isila'ilano kia ũ, ndí Abeli Mehɔla gbẽ Safata né

Elisa di n gēē ũ anabi ũ. Gbē pɔ̀ bò Azaeli fēnda lezĩnɔ̀, Yehu mí da an dēdē. Tó an bò Yehu fēnda lezĩ sɔ̀, Elisa mí da an dēdē. Baa kũ beedo má Isila'ilanɔ̀ vĩ gbēn oaa sɔsɔɔ lɛɛ soopia (,). An gbēke di kute Baaline à lepèwao.

Iliasu Elisa sisina

Akũ Iliasu fēte à bò gũ, à gēē à Safata né Elisa lè, ada saapa kũ zunɔ̀do kũ a gbēnɔ̀do sokon kwi wɛɛpia. Akũ mí ku kpɛ. Akũ Iliasu nà a sɛɛ, à a utada kàla. Akũ Elisa a zunɔ̀ tò gũ, à basì à tɛ Iliasudi, akũ à ònɛ: To mà gɛ lezadi ma mae kũ ma dadowa gĩa, mí basa mà mɔ̀ mà tendi sà. Iliasu ò: Gɛ, ndí suka n̄ su. N̄ yā pɔ̀ ma kènne dɔ̀. Akũ Elisa sùka à a zù pinɔ̀ zɔ̀ɛ, à tekà kũ zù zĩkɛbɔ̀nɔ̀do, akũ à zù pinɔ̀ nɔ̀bɔ̀ fufukè à kpà gbēnɔ̀wa an sò. Akũ à tɛ Iliasudi, à gɔ̀ a gaakenna ũ.

Kianɔ̀ Takada Piade

Iliasu kũ kia Aaziado

Ahabu gana kpɛ Mɔ̀abunɔ̀ an gĩna sì Isila'ilanɔ̀wa. Gɔ̀ pɔ̀ Aazia bò zaa a kpɛdinakɔ̀la taagaũ Samalia à lètɛ, ada gyāke. Akũ à gbēnɔ̀ zĩ à ò: À gɛ Ekeloni tãa Baalizebu ladimeɛ, tó maa aafia le kũ gyā dido. Akũ Deke Malaika ò Tisɛbɛ gbē Iliasunɛ: Fete n̄ gɛ dadi Samalia kia zĩnnanɔ̀lɛ, ní an la, anda e Lua ba ku Isila'ila busuũ, akũ andá gɛ yāladi Ekeloni tãa Baalizebuwa ya? A yādi ma ò Aazia da fete wutebɔ̀ pɔ̀ a wutenawawao, àa ga. Akũ Iliasu gēē à ò maka.

Pɔ zĩnna pinɔ sùka an tà kia kĩa, akũ à an lá à ò: À kè laba a suka a sui? Akũ an wènɛ an ò: Nɔgɔnke mí mò à dàwale, à òwěa wà suka wà su, wí onnɛ, Deke ò nda e akũ ba ku Isila'ila busuño, akũ n gběɔ zĩ yāladi Ekeloni tãa Baalizebuwa ya? A yādi nda fete wutebo pɔ n wutenawawao, nda ga. Akũ kia an lá à ò: Nɔgɔna pɔ mò à daale à yā'òanɛ pì de laba ni? An wènɛ an ò: Pɔkã uta nɔgɔna pì dana, mí a baa asanɛ dɔna. Akũ kia ò: Tisebe gbě Iliasun nu.

Kia a zĩkan gběɔn bapiakwi kũ an dɔn'eededo zĩ Iliasu kũdi, akũ an gèɛ an a lè zĩtena sīsĩ musu. Dɔn'eede pì ònɛ: Lua gbě, kia ò pita! Iliasu wènɛ à ò: Tó Lua gběɔn ma ũ, te bo luabe, i kũmma kũ n zĩkan gběɔn bapiakwinɔdo. Akũ te bò luabe, à kũmmá an piki. Akũ kia sùka à zĩkan gběɔn bapiakwi kenɔ kũ an dɔn'eededo zĩ dɔ. Dɔn'eede pì ò: Lua gbě, kia ò pita kpaaka! Iliasu ònɛ: Tó Lua gběɔn ma ũ, te bo luabe, i kũmma kũ n zĩkan gběɔn bapiakwinɔdo. Akũ Lua te gbèɛ, à kũmmá an piki. Akũ kia sùka à zĩkan gběɔn bapiakwi kenɔ kũ an dɔn'eededo zĩ a gẽn aakɔde. Dɔn'eede pì gèɛ à kùtɛ Iliasunɛ à kutɛkpàne à ò: Lua gbě, maakũ kũ n zoben gběɔn bapiakwi dinɔdo, n wá unde towěa. Te bò luabe à kũ gẽn'eede gběɔn pia kaakunɔwa kũ an zĩkannanɔdo piki. Tiasa sɔ ma unde tomea. Akũ Deke Malaika ò Iliasunɛ: Pita n gedo, su n vĩamaneɔ. Akũ à pita, an gèɛ kia pì kĩa kɔa. Akũ Iliasu ò kia pine: Deke ò nda e akũba ku Isila'ila busuño, akũ n gběɔ zĩ yāladi Ekeloni tãa Baalizebuwa ya? A yā mí tò nda fete wutebo pɔ n wutenawawao, nda ga. Akũ kia Aazia pì gà lapɔ Deke ò Iliasunɛ à òba.

Yahudanɔ kia Yeholamu, Yehosafata nɛ kpatabena wɛ̃ piadeũ an Yolamu zĩte Aazia gɛ̃e ũ, pɔ Aazia pì ba nɛnɔgɔna vĩo yādi. Aazia yā kɔwɔnɔ ku Isila'ila kianɔ takada zɔ̃kɔ̃u.

Deke Iliasu sɛn tanado a kĩa

Lapɔ Deke Iliasu sɛ̃ kũ totodo à sùdo a kĩan di: Pɔ Iliasu kũ Elisado bò Giligali, an bɛ zɛũ. Akũ Iliasu ò̃ Elisane: Zɛ la! Deke ma zĩ Beteli. Akũ Elisa ò̃: Kũ Deke tɔdo kũ n tɔdo maa kɛmmao. Pɔ andá gɛ Beteli, akũ anabinɔ gāade pɔ ku Betelinɔ an bò an mò an Elisa là an ò̃: Zaapɔ ní dɔ̃ pɔ Deke dá n deke simma gbāao de? À wènné à ò̃: Má dɔ̃. À nite! Akũ Iliasu ò̃ Elisane: Zɛ la! Deke ma zĩ Yaliko. À wène à ò̃: Kũ Deke tɔdo kũ n tɔdo maa kɛmmao. Akũ an gèe Yaliko. Anabinɔ gāade pɔ ku Yalikonɔ an bò an mò an Elisa là an ò̃: Zaapɔ ní dɔ̃ pɔ Deke dá n deke simma gbāao de? À wènné à ò̃: Má dɔ̃e bi! À nite! Akũ Iliasu ò̃ne: Zɛ la! Deke ma zĩ Uudɛ̃. À wène à ò̃: Kũ Deke tɔdo kũ n tɔdo maa kɛmmao.

Akũ an tɛ kɔ̃di, anabi gbɛ̃n bapiakwinɔ tẽndi. Pɔ gbɛ̃n pia pinɔ zè Uudɛ̃ lewa, akũ anabi pinɔ zè zāu. Akũ Iliasu à a utada bò à kpàkĩ à í lèdo, akũ í pì wɛ̃ kɔ̃wa zaa a lela ee a lele à gɔ̃ gu gii ũ, akũ gbɛ̃n pia pinɔ bùa. Pɔ an bùa, Iliasu Elisa là à ò̃: Bó ní yidi mà kenne ee Lua dakũ ma simmai? Elisa wène à ò̃: To n anabikegbāa pɔ ní vĩ gɔ̃mea ee lɛɛ pia. Akũ Iliasu ò̃ne: Yā pɔ n là pì zĩĩ. Gɔɔ pɔ Lua dá ma simma, tó n ma e, àa gɔ̃nne. Tó ndi ma e sɔ̃o, nda leo. Pɔ andá yā pì o, andá gɛ maka, akũ sɔ̃go tɛde kũ s̃́ tɛdenɔdo an an kɛ̃ kɔ̃wa, akũ Iliasu tà musu kũ totodo. Pɔ Elisa è, à wikipè à ò̃: Ma mae! Ma mae! Ma

Isila'ilano zĩkasĩgonɔ kũ a s̃denɔdo è. I a e dɔo, akũ à a pɔkasano gàte à pàa. Iliasu utada pɔ wòtowa à lète an à sète, akũ à sùka à gèe à zè Uudẽ lewa. À í lè kũ Iliasu utada pɔ à kũna pido à ò: Deke Iliasu Lua ku máí? Pɔ à í lèdo maka, akũ à wè kōwa zaa a lèla ee a lele, akũ à bùa.

Anabino gāade pɔ bò Yalikono dá gwa, akũ an ò: Iliasu anabikegbāa g̃ Elisanɛ. Akũ an mò an dàle an kùtɛnɛ an ò: Waakũno n zɔbennano, wá nɔgɔn gbāa gbẽn bapiakwino vĩ. An gɛ an n deke wɛtɛ. Wìdikũ d̃o tó Deke Nina a sè à a zù gbesĩsĩ ke musu kó gusite keũ. Akũ Elisa ò: Á su à an zĩo. An nàkewa ee à kènɛ wɛ'i yā ũ, akũ à ò: À an zĩ. Akũ an gbẽn bapiakwi pino gbèe, an Iliasu wètɛ gɔɔ aakɔ, andi a eo. Pɔ an sùka an sù, an Elisa lè Yaliko, akũ à ònné: Mi oanɛ á su à geoo de?